



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მირქმის დედათა მონასტერი

მირქმის დედათა მონასტერი, წმ. ანას (საიდნაიას), მცირე ყოვლადწმინდას, დედათა მონასტერი. დარბაზული ნაგებობა მდებარეობს ძვ. იერუსალიმის ქრისტ. უბანში და ეკუთვნის ბერძნულ მართლმადიდებელ საპატრიარქოს. გადმოცემით, სახელი საიდნაია დამასკოს (სირია) მახლობლად მდებარე ამავე სახელწოდების მონასტრიდან (VI ს.) ლუკა მახარებლის მიერ დაწერილი ღვთისმშობლის სასწაულმოწმედი ხატის იერუსალიმში გადატანას უკავშირდება.

მ. დ. მ-ის შესახებ ყველაზე ადრინდელი ცნობა 1187 განეკუთვნება და მოიხსენიება როგორც წმ. ანას მონასტერი; იგი ამავე სახელით ბერძენთა საკუთრებად მოიხსენიება სულთან სელიმის 1517 ფირმანში, ხოლო 1685 ერთ-ერთ დოკუმენტში იგი დასახელებულია დავალიანებულ და თითქმის დაცლილ ქართ. მონასტრებს შორის; იერუსალიმის პატრიარქი დოსითეოს II კი ვახტანგ VI-თვის გაგზავნილ ეპისტოლეში (1706) წმ. ანას მონასტერს ქართვ. მეფეთა და დიდებულთა ფინანსური შემწეობით „ვალების გარეშე და ყოველმხრივ თავისუფალ“ ხუთ მონასტერს შორის ასახელებს.

ტ. გაბაშვილის „მიმოსღვის“ ვარიანტებით, მ. დ. მ. რაჭის ერისთავებს – ჩხეთისძეებს აუშენებიათ („რაჭის ერისთავთ და მათი მოჴსენება მუნ არს, დედათ მონასტერი არის“; „ქ. ყოვლად წმიდისა რაჭის-ერისთავთა, ჩხეთის გვართა – მირქმის მონასტერი“). იგი, სავარაუდოდ მონასტრის აღდგენას გულისხმობდა, თარიღს კი არ აზუსტებს. მოღწეულია მხოლოდ ერთი აღაპი ჩხეთის გვარის წარმომადგენლის – რუსი ჩხეთის ძისა. მას XIV ს. დასაწყისში უცხოვრია და დიდი „დაჭირვების“ ჟამს, როდესაც მუსლიმებმა „ჯუარი შემოგუაქციეს“ ე. ი. 1305, როცა ჳვრის მონასტერი ქართველებს დაგვიბრუნეს, ხუთასი თეთრი გადაუცია მონასტრისთვის. თუმცა ძნელია იმის თქმა მ. დ. მ. რუსი ჩხეთიძემ

განაახლა თუ ამ გვარის სხვა რომელიმე წარმომადგენელმა.

1936 წმ. მიწასა და სირიაში მოგზაურობისას მ. დ. მ. მოინახულა გრიგოლმა (ფერაძე), რმაც აქ ნახა მაცხოვრის გამოსახულება ბერძნული (და არა ქართული, როგორც პ. უსპენსკი აღნიშნავდა) წარწერით.

ლიტ.: მ ა მ ი ს თ ვ ა ლ ი შ ვ ი ლ ი ე., ქართველები და ბიბლიური სამყარო, თბ., 1998; მ ე ტ რ ე ვ ე ლ ი ე., მასალები იერუსალიმის ქართული კოლონიის ისტორიისათვის, თბ., 1962; ქართული ქრისტიანული თემი წმინდა მიწაზე, შემდგ. გ. გ ა გ ო შ ი ძ ე , ნ. კ ვ ი რ ი კ ა შ ვ ი ლ ი , თ. ც ე რ ა ძ ე , ლ. ხ ო ფ ე რ ი ა , მ. ჯ ა ნ ჯ ა ლ ი ა , თბ., 2022.

ე. მამისტვალიშვილი
